

САБИЙЛЕНИ КЪОРУУЛАУНУ ХАЛКЪЛА АРАЛЫ
КЮНЮ НИККОЛА АЙНЫ (ИЮННУ) БИРИ



2020

6+

Нюр



ISSN 0207 - 6843

ТАУЛУ КЪЫЗЧЫКЪ Баппаханланы
битеудуния кюнюнде



ГУРТУЛАНЫ Мариямны
«Бешик жырла» деген
китабындан

«Бёлляу»

Бёлляу-бёлляу, жиляма,
Кёзлерими гинжиси.
Бёлляу-бёлляу, тынч жукъла,
Жюрегими инжиси.

Акъ сютюмю береме,
Жукъла, кийик улагъым.
Жаным кибик кёреме,
Мени жарыкъ чырагъым.

Кечем, кюнюм сагъайып,
Ауур кёрмей жюрютдюм.
Сен жилясанг, жюрегим,
Бузча болуп, эриди.

Байны малы кёп болур,
Жарлы малы арыкъды,
Жарлылыкъгъа жиляма,
Жарлы кёлю – жарыкъды.

Тобугъумда ёсдюрюп,
Уллу жашчыкъ этерме,
Ырахат болуп жюрегим,
Муратыма жетерме.

Акъылбалыкъ сен болсанг,
Сени халкъгъа берирме.
Бир насыбым бар эсе,
Элге жарап кёрюме.

КЪУЛИ КЪАЙСЫННЫ ЭСГЕРЕ

Бу айда Къули Къайсын дунядан кетгенли 35 жыл болады. Сабийлеге атап ол кёп назмула, жомакъла жазгъанды. Биз аланы басмалай-басмалай турабыз. Ма энтта да, Къайсынны эсгере, бир тауушлукъ назмулары.

ПЕРЕН СЕЗ

Къызчыкъ анасы бла,
Къызчыкъ ыннасы бла
Барады жаз орамда
Кёп гюллю кюн арада.

- Ынна, сен къартчыкъса да?
- Хау, балам, хау.
- Ёлмейин къаллыкъса да?
- Хау, балам, хау.

- Анам, сен а жашса да?
- Хау, къызым, хау.
- Къарт болмай къаллыкъса да?
- Хау, къызым, хау.

Сабийчикни оюнда
Хата, харамлыкъ да жокъ.
Сабий кёрген дуняда
Анагъа къартлыкъ да жокъ!..

ШИЛЕК

Терек, сабырлыгъынгы,
Кёклюгюнго бер манга.
Къая, мамырлыгъынгы,
Беклигинги бер манга!

Аласыз мен кёп кере
Сукъландым, сизни кёре.

Суучукъ, жарыкълыгъынгы,
Тазалыгъынгы да бер.
Тау, бийик акълыгъынгы,
Азтлыгъынгы да бер.

Аласыз мен кёп кере
Сукъландым, сизни кёре!..



УСТАЗЛАГЪА, ОКЪУУЧУЛАГЪА ДА БОЛУШЛУКЪ ДЕРСЛЕРИ

ИГИ СЁЗ

*Иги сёзню бичакъ кесмез,
Иги сёзню боран элтмез,
Иги сёзюнг отда кюймез,
Иги сёзге багъа жетмез.*

Кязим

Сёздю хар игиликни да башы.
Адамны сёзю – аны кюзгюсюдю.
Адамны сёзю – кимни ким болгъанын
олсагъат кёргюзтюп къояды.

Сёз – сауутду. Андан да кючлюдю.
Эсли сёз къыралла арасында урушла-
ны тохтаталады. Эссиз сёз уруш баш-
латалады. Акъыллы сёз, эсли сёз жау-
ланы жарашдырады. Шуёх этеди.

Шуёхлукъ, къарындашлыкъ ариу,
сакъ жюрютюлген сёзню сюеди. Аны
алай жюрютгенле уа кимледиле –
акъыллы, эсли адамла. Эссизни, те-

лини тилинде сёз кёп палах этерге да
болады.

«Сёз – бир, къулакъ – эки, эслеп сё-
леш», – дегендиле эрттегилиле.

Адам ол затны сабийликден билсе
керек.

«Чыбыкълыкъда бююлмеген – къа-
зыкълукъда бююлмез», – деп бош ай-
тылмагъанды.

Иги сёзле – адамланы эслеринде
нарт сёзле болуп къаладыла.

Сёзню багъасы да анда чыгъады –
айтханынг бла этгенинг бир болса.

ГУЗЕЛАНЫ Махмут

ОЙЛАП СЁЛЕШ

**Ойлап айт сен сёзюнгю,
Адам айып этмезча,
Сени эшитген ичинден
Санга кюле кетмезча.**

**Ойлап сёлеш сёзюнгю,
Сенден юлгю алырча,
Адамны жюрегинде
Ариу ызынг къалырча.**

Бетни бардыргъан БЕГИЙЛАНЫ Абдуллахды



АППАЙЛАНЫ Лариса

Мудах терек

Эрттенлик. Битеу дуня башы жукълап уянган насыплы заман. Мен а – кимден да къууанчлы, кюн биринчи мени тереземе тиеди да андан. Кюн таякълары, жауун тамычыла бла ойнай, ариу кюнню эрттенин тейри къылыч бла айбатладыла да, элими бийик тауларын бютюн ариу этдиле.

Олсагъатлай тенглерим бла агъачха барлыгъыбыз эсиме тюшдю. Женгил кийинип, арбазгъа чыкъдым. Терк окъуна уллу эмен терекни къатына жетип, сагъышландым: «Баям, мени аппам кёп кюнледе келген болур эди бу жол бла. Бу терекни аны атасы уа кёрген болурму эди?»

Аны бутакълары, къарт аппамы къолларыча жыйырылып, мудах эдиле. Сагъыш этдим:

– Баям, бизнича, бир озуп баргъан адам, эслемегенлей, солур муратда, балтасыны жютю ауузу бла ачытып, не уа уллу ауур артмагъын бутагъына тагъып, сындырып къыйнагъанындан мудах болгъан болур бу терек. Къартылыгъ'а мудахлыкъгъа хорлат-

ханнга теркирек келеди. Огъесе, уучу къууа келип, жанлыны ол терекни башында букъгъанын эслеп, ёзегин аямай ауур къазыкъ бламы тюйген болур эди?

Терек кёп сылтауладан мудах болургъа болады. Биз а – адамла, табийгъатны патчахлары – «биз» деген ёхтемлик бла къаллай бир жаны болмагъан затны ачытабыз!

Башымы ёрге этип къарагъанымда, ол мудах терекни жашил чапыракъларында жауун къоюп кетген тамычыладан бири, манга кёз къысханча, кюнню бугъуп тургъан бетин дунягъа ачды.

Олсагъатда мен сабийлигиме жомакъларына кетгенча болдум. Ыннаммы ауазы, бу ариу тереклени чапыракълары бла бирге эжиу этип жырлагъанча, хар терекни чапырагъы манга:

– Эй, алаамат жолоучу! Манга да, бур жауун тамычыланы, – дегенча, бутакълада къалтырай эдиле. Мен да билмей тургъанлай, тынчылыкъны элияны чартлагъан тауушу бузду. Сермеп, аппамы кийиз къалпагъын башыма кийип: "Энди жайыгъыз этеклеригизни, жазны, жайны жыйрыгъын да, табийгъат тюрсюнлерин эниклей, тейри къылыч дунягъа ариулукъну жаяды!" – дедим.

Мудах эменни тубюнде жауундан бугъуп, жауун тамычыланы «жырларына» тынгылай, ариу макъамлары, таулу кийимлери бла тойгъа тепсерге чыкъгъан хур къызлача, гюлмедини акълыгъын таза табийгъатны бетине жайгъанча кёрдюм.

Мен а, энди агъач талада, гелеу сыртлада айланган адамла агъачда жауунну макъамын эшитселе эди, аны балта ауузу неда от ызлары бла ачытмаз эдиле деген оюм келди.

Тёрегегиме къарап, мудах терекге жыр айтхан жауун тамычылагъа, жашил чапыракълагъа да ыразылыгъымы билдире, тенглерим бла тубеширге айтхан жерибизге тебиредим.

ПУШКИН ТУУГЪАНЛЫ – 221 ЖЫЛ

ПУШКИН БЛА САБИЙЛИК

Бизни элде бир жашчыкь болуучу эди. Бурмабаш, кьарачашчыкь. Эл-лиле анга Пушкин деучю эдиле...

Эсимдеди кьарт аппа: «Пушкин, барчы, ол эшекни бери сюрюп кел!» – дегени. Пушкин да, сызылып барып, эшекни кызындырып жетгени.

Алайды да, Пушкин бизни элде жашагъан бир керти адамыбыз эди. Школда мени бла бирге окъугъан.

Кюнлени бир кюнюнде устазыбыз Жагъа Якубович:

– Сабийле, бюгюн Пушкинни жомагъын окъурукъбуз, – дегенинде, биз, сабийле, сейир этип, барыбыз да Пушкиннге бурулуп, къарап кьалдыкь...

– Хусейинни жашы Пушкинни угъай, – деди устаз, кеси да Пушкиннге къарап, – уллу орус поэт Александр Сергеевич Пушкинни...

Бизни Пушкинден сора да Пушкинми барды деп, бек сейир этдик. Сора устаз китапда уллу орус поэтни суратын кьргюзтдю. Биз китапха аралып кьалдыкь – суратдагъы бизни Пушкин эди!!! Бурмабаш. Къарачыкь. Ма ол сурат:



Устаз жумушакь ауаз бла Пушкинни жомагъын окъуп башлады:

Юч эгеч, урчукь алып,
Кеч кьарангыда халы
Ийире болгъандыла.
Бирлери айтды: «Ханны
Къатыны болсам, – деди, –
Къыркь къазан асар эдим –
Халкь ашап тоймаз кибик,
Тюбюнде кьоймаз кибик».
Башхасы айтхан эди:
«Ай, болса уа хан эрим!
Хан эрим болсам, – деди, –
Чепкенлик согъар эдим,
Дуниягъа жетер кибик,
Халкь сейир этер кибик!»
«Мен а, – деп кичилери, –
Хан болгъан болса эрим,

Сукъланыр кибик анга,
 Жаш табар эдим ханнга»...
 Ол да шо айтыр-айтмаз,
 Жырылдап эшик аз-маз,
 «Кеч ахшы болсун!» – деп, хан,
 Ушакъны эштип тургъан,
 Шош кирип келди, дейди,
 «Ариу къыз, – деди, дейди, –
 Бáрындан да сен кичи,
 Бáрындан да сен энчи,
 Бóлчу ханынгá бийче!..



Сагъайып, шум-шумалакъ болуп тынгылайбыз...


*«Оруслупа да бизнича селеше кереме!» – деп, бютюнда сейирге къа-
 лып... Сорургъа уа эсибиз жокъ...*

Устазыбыз а бардырады:

Акъ къанкъаз келди, жюзюп.
 Сора селешди, тизип:
 «Кюн ахшы болсун! Бийим
 Нек мудахды, нек, ийи?
 Жауарыкъ кюнлей – былай
 Некди басылып, бир айт?»
 «Да, андан мудахма мен -
 Барды бир Аллах билген
 Бир жерде бир аламат,
 Бир сейир иш».– «Ангылат». –
 «Суу кёбюп, кёпдюрюлюп,
 Тенгизи кётюрюлюп,
 Чайкъалады, булгъанып, –
 Таларыкъча болгъанны.
 Сора жайылады да,
 Сора жыйырма бла

Он тулпар тизилишип,
 Сынжырлай юзюлюшюп...
 Тизилип келгенлени
 Чий алтын кубелери.
 Бек алларында уа мор





Чепкенли къарт Черномор.
Бир кёрсем эд аланы –
Ол батыр тулпарланы!»
Акъ Къанкъаз айтханды: «Ах,
Болма, Кюнюм, сен мудах! –
Мен танийма аланы,
Ол батыр тулпарланы.
Сен излеп, кюсеп тургъан
Батырла мени туугъан
Къарындашларымдыла.
Сен сагъышларынг бла
Бош къыйнама кесинги,
Бар, юйде бол, келселе...

Биз а, эсибиз асыры жомакъгъа кетгенден, ол жыйырма бла он тулпар, тизилишип, бусагъат классха кирип келликча, бир сагъая, бир ырахатлана тынгылайбыз...



Эрленчик жырла айта,
Чертлеуюкчюкле арта,
Чертлеуюкчюкле бары –
Алтындан тышчыкълары...
Ичлери инжи, жаухар –
Ма керти сейир хапар!

*Жокъ эди дуняда бизге бу жомакъдан сейир зат.
Ол «керти сейир хапар» дегеннге, керти да ийнанып...*

Ол кюнден сора Пушкинни иги таныдыкъ. Бурмабаш тенгибизге Пушкин деп нек аталгъанын билдик. Бюгюн да Пушкин болгъанлай айланады. Керти атын, эсеме тюшюрюп, айталлыкъ да туююлме.

Жолда-къолда жолугъуп къалгъаны зат болса:

– Пушкин, къалайса? – деп сёлешиучюме.

Ол да:

– Да-а, турама, – дер.

Абдуллах Бегий улу

КЪАРАЧАЙ-МАЛКЪАР ХАЛКЪ ЖОМАКЪ

*Жомакъ, жомакъ – жолунга,
Агъач кюрек – къолунга,
Жау сюртюлсун тонунга,
Сом къошулсун сомунга,
Алтын минчакъ – бойнунга,
Тузлу гюттю – къойнунга,
Гоппан боза – къонакъгъа,
Тынгылагъыз жомакъгъа.*



Эртте-эртте бир отунчу болгъанды. Агъачда отун этип, аны сатып, юйюрюн аны бла кечиндирип жашагъан. Бир жол агъачда балтасын тюзюреди. Тас этеди. Излейди, излейди – табалмайды. «Энди мен къалай жашау этерикме, юйюрюмю не бла кечиндирликме?» – деп, уллу бушуу-бушман болады. «О Тейри, мени балтамы табып берсенг, манга андан уллу ахшылыкъ ёмюрде болмаз эди! Балтамы табаргъа болуш» – деп, Аллахдан тилегенди.

Тейри, отунчуну тилегин эшитип: «Аллай бир жарсыма, ол алайда балта сени туююлмюдю?» – дегенди. Къараса – чапыракъла тубюнден алтын балта жылтырай тура!

– О Тейри, бу алтын балта мени туююлдю, – дегенди.

– Сора бумуду сени балтанг? – деп, кюмюш балтаны кёргюзтгенди.

– Огъай. Бу кюмюш балтады. Ол да мени туююлдю, – дегенди.

– Да сора ол алайдагъы болур, – деп, агъачсап балтаны кёргюзтгенди.

– О-о! Ма мени балтам! – деп, отунчу къууанганды.

Аллах, отунчуну тюз адам болгъанын кёрюп, юч балтаны да анга берип къойгъанды.

Отунчу элге келгенинде, бу сейир-тамашаны айтханды.

Аны эшитип, къолларына балтала да алып, кёп адам, къууулуп, агъачха баргъанды. Балталарын «тас» этгендиле. Тейриден тилегендиле, жал баргъандыла. Тейри былагъа да бирер алтын балта бергенди. Жангыз бири да мени туююлдю дегенди. Ол заманда Тейри, быланы кеси балталарын да сыйырып, агъачдан къыстап къойгъанды.





ЁЛМЕЗЛАНЫ Мурадин

ОНЮОНЧЮ ИНГИР

АЛТЫҢ ЧЫПЧЫКЪ

Агъач кыйырында бир къарт киши бла къарт къатын хузум гытыда жашап болгъандыла.

Бир жол къарт отуннга баргъанды. Бир уллу терекни сайлагъанды да, кесерге тебирегенди. Къарт балта бла керилгенлей, терек тешикден бир алтын чыпчыкъ учуп чыкъгъанды.

– Хурметли акъсакъл, терегими кесме! – деп сёлешгенди ол.

Къарт, сейирге къалып, къолундан балтасын окъуна тюшюргенди.

– Балачыкъларым алыкъла уча билмейдиле, не суйсенг да, аны берирме, жаланда терегиме тийме! – деп чююлдегенди биягълы.

– Охо сора, – дегенди къарт, – кълышха жетерча бир отун эт да, аны арбазыма элт.

– Сен ююнге бар, отун ючюн а кълыйгълы этме, – дегенди алтын чыпчыкъ.

Къарт киши ююне келгенди.

– Отунсуз нек келгенсе, худур кълалай биширликме?! – деп, тырман этгенди къарт къатын.

Къарт чыпчыкъны хапарын айтханды.

Эрттенликде туруп къларасала – арбаз отундан толуп.

– Тейри, бу бош чыпчыкъ туююлдю, – деп ойлагъанды къарт. Сора, балтасын да алып, биягълы терекге баргъанды. Баргъанды да, балта сырты бла терекни кълкъгъанды. Алтын чыпчыкъ уясындан учуп чыкъгъанды да:

– Хурметли акъсакъл, не керекди? – деп соргъанды.

– Мен хузум гытыда жашайма, манга кѳошун башлы, беш отоулу, он терезели юй керекди! – дегенди кѳарт.

– Айтханынг марда, энди уа ызынга кѳайт, – деп, алтын чыпчыкѳ учуп кетгенди.

Кѳарт кѳатын бла кѳарт киши эрттенликде кѳошун башлы, беш отоулу, он терезели юйде уянгандыла.

Кѳарт биягы агѳачха баргѳанды. Балта сырты бла терекни кѳакѳгѳанды да, алтын чыпчыкѳ чартлап чыкѳгѳанды.

– Не керекди, хурметли кѳарт? – деп соргѳанды ол.

– Манга мал керекди! – дегенди ол.

– Кѳайгы этме, мал да болур. Энди уа юйюнге бар, – деп, алтын чыпчыкѳ учуп кетгенди.

Эрттенликде эки кѳарт да туп кѳарасала – тийре малдан толуп. Ала малларын сау кюн санагѳандыла, алай санап ахырына чыгѳалмагѳандыла.



– Энди уа чыпчыкѳдан не тилейим? – деп соргѳанды кѳарт киши кѳарт кѳатынга.

– Малкѳз болма. Энди небиз да барды, – дегенди кѳатын.

– Кѳара анга, быллай насыпдан адам кѳачамыды? Мен хан болургѳа сюеме, кѳул-кѳарауаш тутаргѳа! Сен а ханыша болургѳа сѳймеймисе?!

– Эй, сен акѳылдан шашып башлагѳан болурса дейме. Кѳызгѳанчлыкѳ игиликте келтирмейди. Бере билген ала да билир. Сау бол дер орунуна мени хан эт деп барсанг, не айтыр? Кѳой, тели болма, – дегенди кѳарт кѳатын.

– Мен хан болургѳа сюеме! – деп, кѳарт киши агѳачха баргѳанды. Ол терекни кѳакѳгѳанды, алай чыпчыкѳ чыкѳмагѳанды. Дагыда кѳакѳгѳанды, чыпчыкѳ биягы чыкѳмагѳанды. Кѳарт киши, ачыуланып, терекни аудургѳанды да, уягѳа кѳарагѳанды. Алай алтын чыпчыкѳ жокѳ эди.

Кѳарт киши юйге кѳайтханды да, этгенин айтханды. Кѳарт кѳатын анга бек урушханды, алай андан не файда: эрттенликде уянып кѳарасала, биягы эски гытыда жатып тура эдиле.

УРУШНУ ТОХТАТХАН КЪОЯНЧЫКЪ

Жюз бла жарым жыл чакълы заман мындан алгъа Максим Ковалевскийи деген бир алим киши Быллым тийресинде, Къала-Къол деген жерде шыякы къаза болгъанды. Анга болуша тургъан таулу жашла алайда бир къоянчыкъны эслегендиле. Жашла, къолларында кюреклерин да жерге атып, ол къоянчыкъны ызындан къуулгъандыла. Къууа-сюре кетип, тутхандыла да, бирден бирге бере, башын сылай, ийнакълай кетип, сора бошлап къойгъандыла.



Ковалевский ол жашланы къоян бла алай ойнагъанларына бек сейир этгенди. Кавказ халкъланы адетлерин иги билген алим адам башха халкълада быллай зат болуп не кёрмеген эди, не биреу айтып окъуна эшитмеген эди. Бу затны юсюнден сагъыш эте кетип, грекли алимни – Геродотну бир хапарын эсгергенди.

Ол хапар былай болгъанды. Бизни жыл санаудан алгъа, 512 жылда къажар патчахы Дарий скифле бла урушха тебирегенди. Скифлени аскерине къажар, бетден-бетге сюелип, урушну башлайбыз деп тургъан кезиуде скифлени алларына бир къоянчыкъ чыгъып къалады. Скифле, уруш этериклерин да эсге алмай, къоянчыкъны ызындан боладыла. Къуууп, тутуп, аны бла ойнап тебирейдиле. Дарийни аскери, скифле былагъа эс бурмагъанларын кёрюп: «Была бизни къайгъылы туюлдюле. Бизни эслерине да алмай, бир къоянчыкъ бла ойнай турадыла», – деп, Дарийге билдиредиле. Дарий, ала айтханнга уллу эс бурады да, уруш этерге базынмай, кече бла, аскерин алып, ызына къайтып кетеди.

Ма бурун заманда ол къоянчыкъ урушну алай бла тохтатханды.

МЫЗЫЛАНЫ Исмайыл

МОКЪАЛАНЫ Магомед

Гинжи ойнайды къызчыкъ

Къарылгъачла учуп жетген жазда
Къызчыкъ гинжи ойнайды арбазда,
Ойнайды, къыл-къыл этип кюле.
Чыммакъ чагъадыла баллиле,
Баллы баллиле.

Бешик жыр айтып гинжилерине,
Ийнакълап селеше хар бирине-
Ол тилейди: «Жукълагъыз-жукъла.
Ариу боладыла кырдыкла,
Шатык кырдыкла,

Гыдай къозучукъ, кюннге жылына,
Тынгылайды къызчыкъны жырына.
Шум тутадыла таула, сыртла,
Тохтап къарайдыла булутла,
Жарыкъ булутла.



Эгешчикле Бёзюланы
Айла бла Зухура

Кюн элпекди,— ойнайды эшикде,
Гинжилерин тебирете бешикде,
Кеси да гинжи кибик къызчыкъ.
Баллиге къонады аязчыкъ,
Жашил аязчыкъ.



КАРАКЕТЛАНЫ Соня,
Къарачай

БАЛ ЧИБИН

Бал чибин учуп барады,
Тёгерегине къарайды,
Гоккачыкълагъа къонады,
Татлычыкъларын жыяды,
Четенчиклеге къуяды.

ГЁБЕЛЕККЕ

Гёбелеккеле учалла,
Гоккачыкълагъа къоналла.
Сабийле да къууаналла,
Ызларындан чабышалла.



Созайланы Камилла



Видео принимаются с 20 мая по 1 июня. Итоги будут подведены в день рождения писателя - 6 июня

Конкурсные видео нужно прислать в Директ театр [volshebnyy_mir](https://www.instagram.com/volshebnyy_mir) или в ватсап 89626494135

МКК «Урванский районный Дом культуры»
Детский образцовый театр «Волшебный мир»

Межрегиональный конкурс творчества «МОЙ ПУШКИН»

1. Стихи
2. Проза
3. Конкурс рисунков по произведениям

Возрастные категории

1. 4-6 лет
2. 7-11 лет
3. 12-14 лет
4. 15-18 лет
5. 19-35 лет
6. 35 лет и старше




Улуу орус поэт А.С. Пушкин 6 июньда 1799 жылда тууганды. Бизни республикада бу кюнледе, поэтге аталып, библиотекада сабий конкурсла, фестивальла, флешмобла, онлайн кёрмючле бардырыладыла.

Бу жыл Пушкин Кавказ бла шагъырей болгъанлы 200 жыл болады. Нальчикде Ленин атлы эм Пушкин атлы орамлада поэтни назмуларындан айбат жарашдырылып, баннерле эм плакатла салыннгандыла.

«Нюр» журналны окъуучулары аны чыгъармалары бла таныша тургъандыла. Аланы окъугъан сабийле журналгъа кеслерини суратларын да жибергендиле. Бэлла да ол конкурсха къатышхан сабийледен бириди.

Ахкёбекланы Бэллагъа 10 жыл болады, Къашхатауда жашайды. Ол сурат ишлеп 6 жылындан башлагъанды. Бусагъатда ДО «Волшебные краски» деген кружокга жорюйдю.

2019 жылда декабрь айда Черек районну творчество арасы (РДДТ) къурап, Бэлланы 40-дан аслам суратын кёрмючге салгъандыла. Къызчыкъны ишлеринде аны акъылыны жютюлюгю, дунягъа кез къарамыны теренли-

ги эсленеди. Алагъа къарай, тегерекде къудуретни биз – таматала, жаланда игиликге ийнанган сабий къызчыкъны кезю бла кёрюрге онг табабыз.

Бу къызчыкъ Аллах кеси чомарт берген фахмусун мындан ары да ёсдюрюгюне бек ышанабыз. Тутхан ишинде уллу жетишимле болдурлугъуна да толу ийнана, этген умутларын толсунла, муратларынга жет, Бэлла, дейбиз!

СЁЗБЕР



ЭНИНЕ: 1. Къангасыз, чуйсюз кепюр ишледи. 3. «Затны бузулмазча, оюлмазча, аумазча, сынмазча, ууалмазча, бююлмезча бек, тёзюмлю, кючлю халы» (Сёзлюкден.). 5. Жазда кийинир, къышда тешинир. 6. Адамда угъай да, киштикде да барды. 8. Аманлыкъ иш этгеннге ол берилир. 10. Окъуучуну билимин билир ючюн этилген жазыу иш. 11. Мардасыз омакъланыучу, кесин бир алапат кёргюзтюрге суйген. 12. Кюйюп бошалгъандан ол къалыр.

ЁРЕСИНЕ: 1. Жолну, жерни нени да барып тирелген жери (тупик). 2. Кючлю, къарыулу, деу, деменгили... – излей барсанг, табарса. 3. Жашай тургъаннга ол келир. 4. Насыплыны оноун ол этер. 5. Жай юсюнге тиймеген, къыш юсюнгден тюшмеген. 7. Аллай жастыкъ. 9. Ауруп тюшген жастыкъ угъай – не болур? 10. Адамда, текеде да болур.

Журналны 5-чи санында (2020) басланган сёзберни жауабы.

1. Татах. 2. Таж. 3. Жай. 4. Батан. 5. Сау.

2020 жылны экинчи жарымында да «НЮРНЮ» алып туругъа суйгенле, почтагъа барып, жазылыргъа боллукъсуз. Жарым жылгъа багъасы - 100 сом жетмеген бирди. Школда окъугъан сабийи болгъаннга, 1-чи, 10-чу класслада болса да, «НЮР» бек керекди. Анда басмаланган затланы сиз бир башха жерде табаллыкъ туююлсюз. Ала сизни балаларыгъызгъа бек болу-шурукъдула: тилни, адепни-къылыкъны билирге, тынгылы адам болуп ёсрге. Ол тукъум затла сизге багъалы эселе, журналгъа жазылыгъыз.

Сорлугъу болгъан бу телефон бла сёлешигиз:
8-928-077-70-67.

БИЛДИРИУ

Журналны юсюнден жазычуланы, окъуучуланы, ишибиз бла шагъырей адамланы оюмларын сурайбыз - жаратхан-жаратмагъан затларын ачыкъ айтырларын да тилейбиз. Журналны аты, жасалгъаны къалайды, тюрлендирик заты бармыды? Ёзге, басмаланган чыгъармаланы юслеринден да окъуучуланы оюмларын билирге сые эдик. Магъанасы келишемиди, тили къалайды, ёлчеми, берилиши не халдады - аллай-аллай шартланы билирге сые эдик. Неге бегирек эс бурургъа тийишлиди? Андан сора да сабийлеге, сабийликге аталгъан жазмаланы да сакълайбыз.

«Нюр»

Ежемесячный
литературно-художественный
журнал для детей

«НЮР» («Свет») № 6-2020 г.

Выходит
с января 1982 года
На балкарском языке

Учредитель:
Государственное
казённое учреждение
Кабардино-Балкарской
Республики «КБР-Медиа»

И.о. главного редактора
А. А. САБАНЧЕВА

Редколлегия:

Л. АХАЕВА
А. БЕГШЕВ
М. БЕШПАНОВ
Т. БИТТИРОВА
Ж. ГУЗЕЕВ
А. МИШАЕВА
М. ОЛЬМЕЗОВ

Оформление
И. АККИЗОВОЙ
Компьютерный набор и вёрстка
А. МИЗНЕВОЙ

Журнал зарегистрирован
Управлением Федеральной
службы по надзору в сфере связи,
информационных технологий

и массовых коммуникаций по
Кабардино-Балкарской Республике
Рег. ПИ № ТУ07-00124 от
11.01.2018 г.

Сдано в набор 25.05.2020 г.
Подписано в печать 08.06.2020 г.
Выход в свет 29.06.2020 г.
Формат 60x90^{1/8}
Бумага мелованная
Гарнитура литературная
Уч.-изд. л. 2,7
Тираж 1390 экз.
Заказ № 1166
Индекс П5895

Стоимость одного номера
по подписке через ФГУП
«Почта Россия» – 15,19 руб.;
за 6 месяцев – 91,14 руб.

Адрес редакции: 360017,
г. Нальчик, пр. Ленина, 5.
Тел.: 42-37-27; 42-14-19.
aripa.sabanchieva@mail.ru

Адрес издателя: 360017
г. Нальчик, пр. Ленина, 5.
ГКУ «КБР-Медиа».
Дом печати.

Отпечатано в ООО «Издатель-
ство «Южный регион», 357600,
Ставропольский край,
г. Ессентуки, ул. Никольская, 5а

Отпечатано в полном
соответствии с качеством
предоставленного электронного
оригинал-макета.